



SERVISIO METEOROLÓGIKO ANTIANAN HULANDES I ARUBA

Seru Mahuma z/n, Kòrsou, Antianan Hulandes
Tel: +599 9 839.3366 Fax: +599 9 868.3999

KOMUNIKADO PA PRENSA

Kambio den fòrmat i orario di emití Pronóstiko pa Públiko

Entrante di awe, djaluna 9 di febrüari, e pronóstikonan pa públiko pa tur isla di Antianan Hulandes i Aruba lo ser emití tres biaha pa dia i e fòrmat di e boletinnan aki tambe lo tini un apariensia un tiki diferente. E boletinnan di pronóstiko pa tantu Islanan ABC komo Islariba awor lo tin e mésun apariensia. E oranan di emití ambos boletin lo ta 6'or di mainta, 12'or di mèrdia i 6'or di atardi. Balides di e pronóstikonan lo ta respektivamente te 6'or di mainta, 12'or di mèrdia i 6'or di atardi di e siguiente dia. E pronóstikonan pa Islanan ABC lo sali na Papiamentu seis'or di mainta i atardi i esun di 12'or di mèrdia lo sali na Hulandes. E tres pronóstikonan aki lo sali na Ingles tambe.

Tur boletin lo indiká e periodo di balides i e ora di kompilashon na parti ariba di e página, sigui pa e sekshon di "Tempu." Si tin kualke Alerta òf Atvertensha na vigor, esaki lo ser anunsiá den un frase djis promé ku e sekshon di "Tempu." E sekshon di Tempu awor lo kontené tambe informashon riba temperatura máksimo i mínimo i tambe lo duna oranan di salida i bahada di solo durante di e periodo di balides.

E siguiente sekshon lo tini respektivamente e sekshonnan di Bientu, Situashon General, Kondishon di Laman, Fenómenonan Spesial, Perspektiva te aki dos dia i finalmente nòmber di e meteórologo responsabel. Durante di temporada di orkan (promé di yüni te ku 30 di novèmber) lo aña di un sekshon di "Sistemanan di Wer Tropikal" ku lo kontené informashon riba siklonnan tropikal aktivo i tambe olanan tropikal ku ta aktivo riba Osean Atlántiko i ku por bai bira di importansha pa nos islanan.

E sekshon di "Fenómenonan Spesial" lo kontené informashon riba por ehèmpel nubia di shinishi di volkan ku por ta di influensha pa nos islanan, temblor ku a ser sintí riba nos islanan i kualke eklipse di solo òf luna ku lo ta visibel riba nos islanan den próksimo dianan.

Den kaso ku tin un menasa repentino di mal tempu òf kondishon peligroso di laman, lo emití un Boletin Spesial ku lo kontené informashon riba òf alerta òf atvertensha pa áwaseru fuerte ku welek ku bos, bientu fuerte, warwarú, laman brutu i posibel tsunami.

Den kaso di menasa di siklon tropikal lo apliká e sistema ya eksistente di atvertensha pa tormenta tropikal i orkan.
